



«Жол картасында» олқылық көп

Биылғы жылдың наурыз айында «Нұр Отан» ХДП бастамасымен елдегі саяси және әлеуметтік тұрақтылықты қамтамасыз ету мақсатында 7 партия басшылары меморандумға қол қойған болатын. Оған қоса, өзара партиялық кеңес өткізіп тұруға келіскен-ді.

Өткен аптада «Нұр Отан» ХДП Орталық аппаратында Партиялық кеңестің кезекті V отырысы өтті. Бұл жолы «Әділет» партиясының ұсынысымен «Үкіметтің дағдарысқа қарсы бағдарламасының әлеуметтік аспектілері» талқыға салынды. Нақты айтқанда, «Жол картасының» жұмысы қаралып, Еңбек және халықты әлеуметтік қорғау министрі Гүлшара Әбдіхалықова партия басшыларының алдында есеп берді.

– Біздің көтеріп отырған тақырыбымыз маңызды. Себебі «Жол картасын» жүзеге асыру кезінде партия бақылаушылары көптеген келеңсіздіктерді, тіпті мемлекеттік органдарда өз қызметтерін тиімсіз орындаған жағдайларды анықтаған, – деді «Нұр Отан» ХДП Төрағасының бірінші орынбасары Дархан Кәлетаев. – Ал біздің мақсатымыз дағдарыс кезінде үкіметтік бағдарламалардың жұртшылыққа дұрыс түсіндірілуі ғана емес, тиімді мақсатта жұмыс істеуі.

Бүгінде бағдарлама аясында 5126 жоба жасалып, 240 197 адам жұмысқа тартылған екен. Өкініштісі, олардың көбі уақытша еңбек. «Біз қала, облыс әкімшіліктерімен бірлесе отырып, халықтың ұзақ мерзімді жұмысқа тұруын



қамтамасыз етуіміз керек», – деді Д.Кәлетаев.

Шетелдік мамандардың орнына қазақстандық кадрларды даярлау мәселесі де өткір тұр. Себебі жалақының аздығына байланысты бөлінген орындар әлі де игерілмей, бос қалған көрінеді.

Еңбек және халықты әлеуметтік қорғау министрлігінің деректерінше, «Жол картасы» аясында 240 мың адам

жұмысқа тұрып, кадрларды қайта даярлауға 67 мың маған жіберілген. Бүгінге дейін республика бойынша жұмыспен қамту орталықтарына 457 мың адам келіп, өтініш берген. Ал 1 қыркүйекке дейін 351 кәсіпорын өз жұмысын тоқтатқан екен.

«Жоспарланған 5126 жобаның тек 2816-ның жұмысы ғана аяқталыпты. Өзгесі әлі жоқ. Неге? Сонда біз жұмыссыз қалған халықты қайда бағыттаймыз?» деді Д.Кәлетаев министр Г.Әбдіхалықоваға сұрақты төтесінен қойып. Оған қоса, жұмыс орындарын көбейту үшін тендерге қатысатын кейбір кәсіпорындардың алдымен, қызметкерлерін жұмыстан шығарып, байқаудан жеңіп шыққан соң, қайта қабылдап жатқан фактілердің кездескенін ашық айтты. Ал министр Гүлшара Әбдіхалықова ондай келеңсіздіктерді анықтауды өз міндетіне алып, жұртты алдаған тиісті мекемелерге жаза қолданылатынын жеткізді.

«Әділет» партиясының басшысы Мақсұт Нәрікбаев Үкіметтің дағдарысқа қарсы бағдарламасының белсенділігі тым төмен екенін айтты. «Еліміздегі ІЖӨ-нің көлемі көбейгенімен, халықтың жағдайы жақсарып кеткен жоқ. Сондықтан құрғақ цифрлардан гөрі министрліктің мамандары қарапайым халықпен жұмыс жасап үйренсін. Ең алдымен, еліміздегі адам ресурсы шынайы бағаланып, сол үшін жағдай жасалуы керек», деді.